

Cultura n'è betg mo relevanta per il sistem, mabain per la vita

La regenza ha surdà il premis grischun da cultura 2020

DA MARTIN CABALZAR/FMR

■ **Venderdi saira ha la regenza grischuna surdà a Malans il Premi da cultura grischun al fotograf artistic Guido Baselgia. Plinavant ha ella era distinguì l'activitad culturala da set ulterius persunas cun in premi da reconuschienscha ed otg persunas cun in premi da promoziun.** Resguardond la situaziun da corona che è vinavant tendida ha la surdada dal Premi da cultura gi lieu quest onn en in rom pli pitschen, dentant tuttina en preschienscha da la gronda part dals onurads a Malans. La publicitad interessada ha pudì persequitar las laudaziuns e la surdada dals premis via livestream. Gist en il temp da corona saja sa mussà con relevanta ed enritginta che la cultura saja per il sistem, ha punctuà cusseglier guvernativ *Jon Domenic Parolini* en ses bainvegni. La varietad linguistica, culturala e regiunala dal Grischun saja singulara en Svizra, las activitads en las spartas architectura, art, litteratura, teater, chant, musica sajan zunt multifaras. Il Grischun na vivia betg l'ultim da sia cultura. «Cultura è la basa per nosa cuminanza, per nosa convivenza ed è uschia er relevanta per il sistem», ha ditg Parolini. La cultura veglia esser vivida, saja quai cun mantegnair tradiziuns ed isanzas, dentant era cun sviluppar novas furmas d'expressiun.

Il fotograf artistic Guido Baselgia

Il fotograf *Guido Baselgia* (68) è creschì si a Puntraschna, ha vivì 30 onns a Zug ed è sa domicilià ils ultims 10 onns a Malans. Ils ultims 30 onns ha el stgaffì in'ovra artistica da gronda impurtanza. Baselgia ha absolvì la scolaziun da fotograf a la Scola d'art applitgà a Turitg ed è alura s'engaschà sco fotograf d'industria e 1983 ha el avert in agen atelier a Baar. Silsuenter ha el fatg numerusas reportaschas da cuntradas arcaicas da l'entir mund publicadas en plirs cudeschs, en la NZZ u en il Magazin dal Tagesanzeiger. Dapi ils onns novanta è el sa fetschentà cun la fotografia artistica. Suent'er avair cumenzà a fotografar cuntradas alpinas en Engiadina è el viaggià en Finlanda e Norvegia, dentant er en Bolivia ed en Chile, nua che la natira è anc pli criva ed arcaica. Ses motivs preferids èn: crap, glatsch e glisch. Sias ovras animechian d'observar ils fundamentals da la



Dus dals undrads, la chantadura Chiara Jacomet ed il battarist Jérôme Keel han embellì la surdada dals premis cun intginas produenziuns musicalas.

FOTO OLIVIA AEBLI-ITEM

terra e da reflectar davart la passageritad da la vita umana. «Guido Baselgia è in poet da la glisch, in reporter da la bellezza ed in maister da la tecnica da fotografar», ha ditg il laudatur *Beat Stutzer* a Malans. Il fotograf artistic haja rediscuvrì las muntognas ed ad el saja reussi da metter en scena a moda singulara la fotografia analoga. In'ovra da clav en la vita da l'artist da 68 onns saja la «Camera obscura» che l'artist ha gist terminà en il silo da sal e glera sin il pass dal Bernina. A l'artist saja reussi da projectar senza ulterius meds tecnics la magnifica cuntrada autalpina en l'intern dal silo. «Era sche nus pudain render plausibel quest fenomen fisical, enserra quest'ovra la magia dal maletg ralentà.» En preparaziun per la primavaira proxima è in'exposiziun sut il titel «Transversale» che vegn accumulada d'ina publicaziun.

Cultura è relevanta per la vita

Per l'onurà Guido Baselgia è tanta onur bunamain suspecta, per el muntia il Premi da cultura dal Grischun dentant fitg bler. Il premi documenteschia ch'el saja – suenter in'absenza da 30 onns a Zug – puspè «arrivà» en sia patria grischuna. La cuntrada da viticultura a Malans, cun il Vilan en il dies ed il Calanda avant egl, saja ordvart inspironta per sia lavur artistica, accentuescha Baselgia.

Cun la surdada dals premis culturals documenteschia la regenza che la promoziun da la cultura na saja betg mo «relevanta per il sistem, mabain cunzert er relevanta per la vita». Gist en il temp difficil dal coronavirus che saja ordvart difficil per ils acturs culturals sajan quels premis dal chantun in act significativ da la regenza. Pertge senza

art e cultura daventia la vita publica e privata tgeua e calma.

Il parsura da la cumissiun chantunala da cultura *Köbi Gantenbein* dat en la medema crenna, accentuond cun bler patos che cultura na stgaffeschia betg mo senn, gudogn e persvasiun propria, anzi er cuminanza. Ils undrads na produceschian betg mo products da luxus e da bellezza, mabain er vivonda. Crisas gidian magari ils umans ad avrir ils eglis. Almain quai.

Gist en vista ad ina segunda unda da Covid-19 che saja zunt virulenta per la cultura, saja impurtant che la politica ed ils pertgiraders da la raison e da las cassas statalas fetschian in segund pass. Cun talent cabaretistic e plects pregnantants ha *Köbi Gantenbein* caracterisà las persunas undradas e reconuschì lur merits culturals.

Premis da reconuschienscha e da promoziun

(fmr/mc) Sper il Premi da cultura grischun, dotà cun 30 000 francs, surdat la regenza era quest onn 7 premis da reconuschienscha ed 8 premis da promoziun ch'èn dotads cun 20 000 francs.

Premis da reconuschienscha
Mübbeccel Akdis (1960) e Cezmi Akdis (1961), scienzada e scienzà da la natira, Tavau. La regenza surdat a Mübbeccel e Cezmi Akdis in premi da reconuschienscha per las scienzas naturalas. En l'Institut svizzer da retschertgas davart allergias ed asma ISRA a Tavau lavuran la medicinra ed il mediciner vi d'enconuschienschas epocalas davart la regulaziun da l'immunitad da l'uman.
Cäcilia Bardill (1948), magistra e politica da musica, Tavau: Sper sia lavur sco magistra da musica è ella s'engaschada vehementamain, endinadamain e cun success per la promoziun musicala en il chantun Grischun. Durant blers onns ha ella influenzà e concentrà – da maniera promoventa, ma er pretendenta – ils interess da las scolas grischunas da chant e da musica.

Breitbart, rappers, Cuira: *Thom Businger, Claudio Candinas, Andri Perl e Valerio Priuli* èn sa scuntrads avant passa 20 onns sco rappers giuvenils. Da la gruppa d'amis èn els sa transfurmads a la gruppa da musica che ha sviluppa cun spiert, savida e fitgadadad lur art – il rap en il dialect da Cuira – e gi success cun quel.
Miriam Cahn (1948), artista, Stampa/Basilea: La pictura e disegnadra excellenta è in exempel per las artistas ed ils artists che han tschernì il Grischun sco spazi da viver e d'abitar e che portan uschia aria internaziunala en il chantun.
Ursina Hartmann (1950), actura e reschissura, Cuira: L'actura e reschissura brigliescha dapi blers onns sin la tribuna. Ella è ina dunna che chapescha en moda sensibla e captivanta da giugar las grondas e las pitschnas rollas dal teater.
Gruppa culturala St. Antönien: Dapi bunamain 30 onns procura ina pitschna gruppa da persunas nunstancientaivlas per cultura en la val da St. Antönien. Ella tgira in museum cun exposiziuns ch'èn mintga giada originalas, organisescha occurrenzas, fa curaschi, ha plaschair e

stgaffescha memoria ed avegnir per la vita en las Alps.

René Schnoz (1966), actur e reschissur, Mustér/Turitg: L'actur e reschissur surprena adina puspè cun produenziuns nunusitadas da teater d'amateurs, saja quai sisum las muntognas en las chamonnas CAS u puspè giu en las vals.

Premis da promoziun

Elia Aubry (1984), artist, Sevgein/Berna: L'artist experimentescha cun bravura e senza sforz cun suns, cun maletgs, cun sequenzas da maletgs sco er cun videos.

Carla Gabriela Engler (1992), scienzada da film ed artista, Zizers/Turitg: Ella collia en moda fascinanta sia savida da scienzada cun la savida d'artista.

Andrea Furger (1995), fotograf, Mesau/San Murezzan: Il giuven fotograf da la Mesolcina posseda las qualitads artisticas adequatas. Suent'er esser sa domicilià en Engiadina, èsi reussi ad el da far or da sia passiuon er sia professiuon e da daventar fotograf da sport, da cuntradas e da reclamas.

Asa S. Hendry (1999), autura ed actura, Lumnezia: Asa S. Hendry lavura sco autura, sco actura e sco performera. Ella surprena, irritescha e motive-scha.

Chiara Jacomet (1999), chantadura, Rabiun: Cun ina vusch bassa impresiunanta e cun buns texts vegn ella a far sia via sco chantadura e sco artista.

Jérôme Keel (1998), battarist, Panaduz: Il battarist è in musicist talentà che stat – cun mo 22 onns – avant ina gronda carriera e che vegn bainprest ad esser in schumbrader extraordinari ed exemplaric per il Grischun.

Marina Woodtli (1987), artista, Cuira/Basilea: L'artista multifara stgaffescha istorgias insistentas davart persunas, davart lur solitariadad e davart lur tschertga da cumpagnia.

Jessica Zuan (1984), autura, Samedan/Barcelona: La poetessa cun gust d'experimentar ha gia scrit ina retscha da poesias extraordinarias damanaivel da las cuntradas e da la natira, che sa storschan andetgamain en la profunditad davos ils plects.